



KREANDO PROSPERIDAT DOR DI KONEKTÁ OPORTUNIDATNAN DI INVERSHON KU INVERSHONISTANAN

SKINA DI INVERSHONISTA

Publikashon 6. 2019

Kon pa invertí?

“Si mi a siña algu den mi karera, ta ku nada den bida ku ta bale
la pena ta fásil. Frankamente ta asina kos ta.”

Carlí Lloyd

Ora mi menshoná na mi amigu- i koleganan ku mi pashon i background ta den invershon, e siguiente pregunta ku nan normalmente ta hasi ta “Bo por siña mi kon pa invertí?” Tambe, de bes en kuando, si mi papia ku un hende sufisientemente largu – tin biaha strañero – ku sa, òf ku al fin i al kabo haña sa ku mi ekspertisio ta den invershonnan, nan lo finalmente atmití ku nan ta aktualmente inskribí den un kurso di hasi negoshi di 3 luna yamá Mi-a-gana-miones-hasiend’è-mi mes-, siña-loke-ami-a-hasi-i-bira-un-mionario-bo-tambe. Esaki a sosodé sufisiente bia ku mi i pues ta hustifiká un artíkulo ku mi ta spera lo duna un òf otro forma di klarifikashon pa yuda bo desifrá si kursonan asina ta legítimo i si komo tal, nan ta apropiá pa bo.

Kursonan manera esakinan ta promové ku nan lo siña bo kon pa hasi negoshi ku akshon, materianan prima i de bes en kuando divisa estranhero. Pero meskos ku hopi otro tereno, nunca tin un solo manera pa logra e meta. Pues, ta krusial pa bo komprondé kiko ta wòrdu bendé na bo den kursonan asina, promé ku bo bula aden siegamente. Tin dos metodologia primario ku por wòrdu usá pa influensia e desishon di kompra / benta di un invershonista – Análisis

Fundamental òf Análisis Tékniko. Pues ta un di e métodonan aki e kursonan aki probablemente ta bendiendo. Laga nos diskutí masha brevemente kada un na su turno.

Análisis Tékniko ta trata di pronostiká si e preis di un akshon / materia prima /divisa estranhero / etc. lo subi òf baha den futuro dor di studia estadístikanan di pasado i di otro aktividatnan di negoshi históriko. Tambe nan lo studia e diferente averahenan di e preis di e siguridat durante un lapso di tempu, entre otro kosnan. Komersiantenan ku ta dependé di análisis tékniko normalmente ta konsiderá un kantidat di grafík ora nan ta hasi negoshi pa asina trata di identifiká patronchinan for di pasado tokante kon e akshonnan a move, pasobra nan ta kere ku e patronchinan aki lo ripití nan mes den futuro. Invershonistanan ku ta usa e método aki ta kere ku informashon kuantitativo históriko (básikamente “data”) i nan tendensianan ta un mihó indikadó di kambionan di preis den futuro ku determinashon di e balor “bèrdadero” di un akshon. En esensia, siguidónan di e tipo di estilo di hasimentu di negoshi aki, realmente no ta prekupá nan mes ku kiko e preis di e akshon lo mester ta pero preferiblemente, nan lo disidí di kumpra òf bende un akshon òf siguridat si e data históriko ta sugerí ku e preis lo por subi mas òf nò.

Di otro banda, Análisis Fundamental ta trata di determiná e balor bèrdadero di un akshon dor di investigá faktornan makroekonómiko manera si e ekonomia ta kresiendo òf ta pasando dor di un reseshon òf si e industria di e kompania ta bayendo hopi bon òf nò! Adishonalmente, fundamentalistanan ta studia faktornan mikroekonómiko tambe manera e kondishonnan finansiero di e kompania, si e ta hasiendo ganashi òf nò i tambe e kapasidat i strategia di e tim di maneho di e kompania pa mantené e kompania lukrativo. E método aki ta studia e estadístikanan históriko pero tambe espektativanan futuro di e salu di e kompania i kon e lo presta pa determiná e balor bèrdadero. E balor aki ku e invershonistanan eksperto ta yama **balor intrínsiko** e ora ei ta wòrdu kompará ku e preis koriente riba merkado i si e balor intrínsiko ta mas abou ku e balor koriente, e invershonista lo kumpra e akshon. Lo kontrario naturalmente ta bèrdat. Den e metodologia aki, e balor di e akshon ta klave!

Tur dos metodologia tin tantu nan méritonan komo nan fayonan, pero manera bo por imaginá bo, un invershonista siguiendo téknikanan di análisis tékniko probablemente lo ta kumprando tiponan di akshon diferente for di e invershonista ku ta apliká téknikanan di análisis fundamental. Pues, ora bo topa e tipo di kursonan aki riba Internèt òf si bo wòrdu aserká dor di un di e entrenadónan aki, mi ta supliká bo di puntra bo mes si bo tin un apetit pa disidí di kumpra un akshon pa motibu di su tendensianan históriko òf si bo ta deseá di kumpra e akshon basá riba su méritonan fundamental. Al final ta krusial pa bo evaluá si e estilo di invershon ku nan ta promoviendo den e kurso ta konsistente ku bo estilo di invershon.

Sierto invershonista profeshonalnan ta usa tur dos, aunke en realidat e profeshonalnan aki lo tin e tendensia di inkliná mas na un estilo partikular ku na e otro. E preguntanan potensial pa bo e ora ei ta “kua ta mas apropiá pa ami?” òf “kua ami ta kere aden?” òf “den kua mi tin konfiansa ku e lo duna mi mihó balor pa mi plaka?”

Mi sa ku por ta hopi pa prosesá pero mi ta spera ku mi a tira un lus riba e fenómeno aki di kurso di siña-bo-kon-pa-hasi-negoshi! Di tal forma ku bo ta motivá pa hasi preguntanan adishonal.

Sigui Skina di Invershonista pa tur kos ku bo mester sa tokante Kreashon di Rikesa!

E editorial aki a wòrdu presentá na bo pa e DCSX ku kolaborashon di Vertex Investments.

Outor di e publikashon aki: Stephanie Shaw CFA, MBA.

